

## 每週經課朗誦經文(巴克禮台語漢字)2013/02/10

### 共同經課 - 1 出埃及記三十四章二十九節~三十五節

29 摩西落西奈山的時伊的手提二塊約碑，伊落山的時伊的面因爲耶和華及伊講話就射出光摩西家已毋知。30 亞倫及以色列眾人看見摩西的時，看啊，伊的面射出光in就驚毋敢倚近伊。31 摩西叫in來；亞倫及會中諸個頭人就攏倒轉到伊遐，摩西就及in講話。32 然後以色列眾人攏進前來，伊就將耶和華佇西奈山及伊所講一切的話攏吩咐in。33 摩西及in講話明白就用帕罩面。34 總是摩西入去耶和華面前及伊講話，帕就掀起來到伊出來，伊出來的時就將耶和華所吩咐的給以色列人講。35 以色列人看見摩西的面，摩西的面射出光。摩西閣用帕罩面，聽候到伊入去及耶和華講話帕就掀起來。

### 共同經課 - 2 詩篇九十九篇

1 耶和華做王；列邦著愕愕！伊坐佇基路兵，地著搖動。2 耶和華佇錫安做大；伊搬(pôa<sup>n</sup>)過佇萬百姓的頂面。3 in著謳佬你大閣通驚畏的名；伊是至聖！4 王有氣力，歡喜公平，你互正直堅固，佇雅各中行公平及義理。5 恁著尊重耶和華——咱的上帝，佇伊腳踏椅的頭前跪拜。伊是至聖！6 佇伊的祭司中有摩西及亞倫；佇求叫伊的名的的人的中間有撒母耳。in求叫耶和華，伊就聽in。7 伊佇雲柱的中間對in講話；in遵守伊干證的話及伊所賞賜in的律法。8 耶和華——阮的上帝啊，你有應in；你雖然照in的所行報應in，猶久你是赦免in的上帝。9 恁著尊重耶和華——咱的上帝，佇伊的聖山跪拜，因爲咱的上帝——耶和華是至聖！

### 共同經課 - 3 哥林多後書三章十二節~四章二節

12 阮既然有此號的向望，所以真好膽來講，13 無親像摩西用帕罩伊的面，互以色列人袂得通注目看到彼個啲衰退者的結局。14 若是in的心變做硬，到佇今仔日in讀舊約的時，彼個帕猶原佇啲無掀開。此個帕對基督就廢去。15 若是到今仔日，不論甚麼時in讀摩西的冊，帕猶久罩佇in的心。16 獨獨不論甚麼時in歸向主，帕就除去。17 今主就是彼個神；主的神佇彼位，彼位就自由。18 咱眾人的面無罩帕親像鏡倒照主的榮光，攏變化做伊的像，對榮光到榮光，親像對主就是神按呢。1 所以阮既然有此個職份，照所得著的憐憫，就無餒志，2 是有棄揀見誚的暗事；無行佇詭譎，無混雜上帝的道理；就是顯明真理，佇上帝的面前將家已證明佇逐人的良心。

### 共同經課 - 4 路加福音九章二十八節~三十六節(三十七節~四十三節)

28 講諸個話了後差不多八日，耶穌帶彼得、約翰、雅各相及上山祈禱。29 祈禱的時，伊的面貌有各樣，伊的衫白閣光熒熒。30 忽然有二人及伊講話，就是摩西、以利亞；31 in佇榮光出現，談論伊的過世，就是伊佇耶路撒冷所欲歷過的。32 彼得及同佇啲的人厭倦眠去，到in精神，就看見耶穌的榮光，以及及伊倚啲彼二人。33 當彼二人離別伊的時，彼得對耶穌講：「先生，咱佇遮真好！阮來搭三間寮仔，一間互你，一間互摩西，一間互以利亞。」是毋知伊所講的。34 講諸個話的時，有雲罩in；in入佇雲內就驚。35 有聲對雲裡出，講：「此個是我的子，我所揀的，恁著聽伊。」36 彼個聲已經出，就看見耶穌家已佇啲。學生靜靜，彼時無將所看見的給人講。37 隔日，in落山的時，有歸陣人來接伊。38 從中有一人大聲叫講：「先生啊！求你看我的子，伊是我孤生的。39 有神掠伊就連鞭喉叫；互伊抽掇到流涎，閣重重傷伊，離開伊實在摠(oh)。40 我曾求你的學生趕伊，也in袂會。」41 耶穌應講：「噍啊！毋信閣悖逆的世代啊，我及恁住，吞悞恁欲到佬久啊？著導你的子來遮！」42 來的時，鬼摔互伊倒，互伊大抽掇。耶穌就責備邪神，醫好彼個囡仔，交互伊的老父。43 眾人攏印愕上帝的大威嚴。